



*Šemsudin Mehmedović*

Broj: 01-1123  
Sarajevo: 11.12.2023.godine

PREDSTAVNIČKI DOM  
PARLAMENTARNE SKUPŠTINE  
BOSNE I HERCEGOVINE  
n/r predsjedavajućeg

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 11-12-2023			
Organizaciona jedinica	Klasifikaciona oznaka	Redni broj	Broj priloga
01-	50-1-	2554	23

**PREDMET:** Zastupnička inicijativa kojom se obavezuje šest institucija Bosne i Hercegovine sa sjedištem u Sarajevu da osiguraju odgovarajuću nacionalnu zastupljenost državnih službenika u skladu sa Zakonom o državnoj službi u institucijama Bosne i Hercegovine

U skladu s članom 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) upućujem zastupničku inicijativu Predstavničkom domu Parlamentarne skupštine Bosne i Hercegovine,

Predstavnički dom Parlamentarne skupštine Bosne i Hercegovine obavezuje institucije Bosne i Hercegovine, i to: Ministarstvo vanjske trgovine i ekonomskih odnosa Bosne i Hercegovine, Ministarstvo finansija i trezora Bosne i Hercegovine, Ministarstvo pravde Bosne i Hercegovine, Ministarstvo prometa i komunikacija Bosne i Hercegovine, Generalni sekretarijat Vijeća ministara Bosne i Hercegovine i Agenciju za državnu službu Bosne i Hercegovine, da u skladu s članom 2. Zakona o državnoj službi u institucijama Bosne i Hercegovine osiguraju odgovarajuću nacionalnu zastupljenost državnih službenika u skladu s nacionalnom strukturom stanovništva prema posljednjem Popisu stanovništva u Bosni i Hercegovini iz 2013. godine.

U skladu s članom 171. st. (2) Poslovnika Predstavničkog doma odgovor u pisanoj formi mora biti dostavljen u roku od 30 dana.

### Obrazloženje

Na 6. sjednici Predstavničkog doma Parlamentarne skupštine Bosne i Hercegovine, održanoj 19.4.2023. godine, predstavio sam analizu odgovora 72 institucije Bosne i Hercegovine koja se odnosila na moje zastupničko pitanje o brojčanoj i procentualnoj nacionalnoj zastupljenosti državnih/policijskih službenika i zaposlenika Bošnjaka, Srba, Hrvata i Ostalih u institucijama Bosne i Hercegovine.

Tada sam ukazao na činjenicu da rukovodioci institucija ne poštuju član 7. Zakona o upravi („Službeni glasnik BiH“, br. 37/03, 102/09 i 72/17), kojim je propisano da su obavezni osigurati odgovarajuću nacionalnu zastupljenost državnih/policijskih službenika i zaposlenika u skladu s nacionalnom strukturom stanovništva, a prema posljednjem popisu stanovništva u

Bosni i Hercegovini iz 2013. godine niti član 2. st. 1. Zakon o državnoj službi u institucijama Bosne i Hercegovine („Službeni glasnik BiH“, br. 19/02,35/03,4/04, 17/04, 26/04, 37/04, 48/05, 2/06, 32/07,43/09,8/10, 40/12 i 93/17) kojim je precizirano da „struktura državnih službenika u državnoj službi okvirno odražava nacionalnu strukturu stanovništva Bosne i Hercegovine prema posljednjem popisu stanovništva“.

**Analizom je utvrđeno da je u čak 59 od 72 institucije očigledan debalans zaposlenih na štetu Bošnjaka i Ostalih. U periodu od aprila do decembra 2023. godine sa prijemom novouposlenih državnih službenika povećan je debalans na štetu Bošnjaka i Ostalih, što dokazuju sljedeći statistički podaci o broju državnih službenika za šest institucija sa sjedištem u Sarajevu (podaci sa veb stranice Agencije za državnu službu Bosne i Hercegovine na dan 5.12.2023.):**

1. Ministarstvo vanjske trgovine i ekonomskih odnosa Bosne i Hercegovine - Bošnjaci 70 (32,4%), Srbi 113 (52,3%), Hrvati 31 (14,4%) i Ostali 2 (0,9%);
2. Ministarstvo finansija i trezora Bosne i Hercegovine - Bošnjaci 47 (39,5%), Srbi 42 (35,3%), Hrvati 28 (23,5%), Ostali 2 (3,4%);
3. Ministarstvo pravde Bosne i Hercegovine - Bošnjaci 30 (34,5%), Srbi 22 (25,3%), Hrvati 32 (36,8%) i Ostali 3 (3,4%);
4. Ministarstvo prometa i komunikacija Bosne i Hercegovine - Bošnjaci 32 (30,8%), Srbi 51 (49%), Hrvati 18 (17,3%) i Ostali 3 (2,9%).
5. Generalni sekretarijat Vijeća ministara Bosne i Hercegovine - Bošnjaci 11 (32,4%), Srbi 10 (29,4%), Hrvati 12 (35,3%) i Ostali 1 (2,9%).
6. Agencija za državnu službu Bosne i Hercegovine - Bošnjaci 32 (30,8%), Srbi 51 (49%), Hrvati 18 (17,3%) i Ostali 3 (2,9%).

U navedenih šest institucija Bosne i Hercegovine ukupna nacionalna struktura državnih službenika je sljedeća:

**Bošnjaci 195 (33,6%), Srbi 246 (42,3 %), Hrvati 127 (21,9%) i Ostali 13 (2,2%).**

Prema popisu stanovništva iz 2013. godine, u Bosni i Hercegovini ima 15,43% Hrvata, 30,78% Srba, 50,11% Bošnjaka i 3,68% Ostalih.

**Činjenica je da je u gore navedenim institucijama državnih službenika Bošnjaka manje za 96 pozicija, Srba ima više za 67 pozicija od broja koji je zakonom utvrđen, Hrvata je više za 37 pozicija i Ostalih je manje za 8 pozicija.**

Ovi statistički podaci o broju državnih službenika nisu slučajni, nego su rezultat dugogodišnjeg zajedničkog djelovanja rukovodilaca institucija koji su članovi HDZ-a i SNSD-a.

Iz ovog proizilazi da u Bosni i Hercegovini nema dovoljno stručnih Bošnjaka i Ostalih za obavljanje „zahtjevnih“ poslova u državnoj službi, nego da te visoke kriterije najčešće zadovoljavaju Hrvati i Srbi, što nije tačno. Da ironija bude veća, zastupnici i delegati iz Republike Srpske u pismu američkom Kongresu i Senatu ističu „navedene nacionalitičke

politike najvećih bošnjačkih stranaka, kao i stalna nastojanja da ostvare prevagu u institucijama vlasti u Bosni i Hercegovini, potvrđuje njihovu namjeru da vladaju Bosnom i Hercegovinom bez Srba i Hrvata“.

Navedeni podaci o nacionalnoj strukturi državnih službenika u institucijama Bosne i Hercegovine jednostavno demantuju ovakve neistine, kao i konstantne navode o tobožnjoj unitarizaciji i majorizaciji od strane Bošnjaka.

Krajnje je vrijeme da se zaustavi zapošljavanje na štetu Bošnjaka i Ostalih, jer je očigledna namjera HDZ-a i SNSD-a da, suprotno Ustavu i zakonima Bosne i Hercegovine, Bošnjaka i Ostalih ima što manje zaposlenih u institucijama Bosne i Hercegovine, a naročito na rukovodećim pozicijama.

S poštovanjem,

**ZASTUPNIK PS BiH**  
**Šemsudin Mehmedović**

